

Aningaasarsianit akileraarutit pillugit paasissutissanik akileraaruseriffimmut nalunaaruteqartarnek pillugu Namminersornerullutik Oqartussat nalunaarutaat nr. 26, 1. december 2006-imeersoq Atuussimasoq (Historisk)

Akileraaruserinermik ingerlatsineq pillugu Inatsisartut inatsisaanni nr. 11, 2. november 2006-imeersumi § 33, § 35, § 36, imm. 2, § 37, imm. 2, § 38, § 39, imm. 3, § 56, imm. 1, aamma § 83 naapertorlugit aalajangersarneqarput:

Aningaasarsiat A-t pillugit paasissutissiineq

§ 1. Akileraaruserinermik ingerlatsineq pillugu Inatsisartut inatsisaanni §§-it 30-imiit 32-mut naapertorlugit paasissutissiinnermi, paasissutissiisussaatitaasut akileraaruseriffiup immersugassiatut sanaavi atussavaat (akissarsianik, pensioninik il.il. nalunaarutiginninnerit, akissarsianut allagartat tunisallu pillugit paasissutissiissutit).

Imm. 2. Akileraaruseriffiup paasissutissiisussaatitaasut imm. 1-imi taaneqartunik paasissutissanik digitalinngorlugit tunniussinissaanut akuerisinnaavaa. Akileraaruseriffiup akuersissummi paasissutissanik piunasaqaatit annikinnerulersissinnaavai aammalu pitsaassusissaannut, ilusissaannut, paasissutissallu qanoq inissiterneqarnissaannut allatigullu paasissutissanik suliarinninnissamut pingaaruteqartunik piunasaqaatit akileraaruseriffiup aalajangersarsinnaallugit.

Kontonik ingerlatsisuusut nalunaarutaat

§ 2. Aningaaseriviit, sparekassit, andelskassit, aningaasanik nioqputillit, vekselinik nioqputillit, eqqartuussissuserisut allallu, aningaasanik erniortitassanik tiguisartut, akileraarusigaanissamut atugassanik ukiut tamaasa namminneerlutik ukiup siuliani erniat tunniunneqartut imaluunniit pisassanngortinneqartut allatulluunniit kontoqartunut ataasiakkaanut iluanaarutigigitat annertussusaat pillugit, ernialiinerup ulluanik il.il. aammalu aningaasat uninngasuutit ukiup siuliata naanerani amerlassusiinik paasissutissanik akileraaruseriffimmut tunniussisassapput. Akileraaruseriffiup aalajangersinnaavaa allanit, ingerlatsinerminnut atatillugu inuit allat aningaasaataannik erniaqartitsisunit, paasissutissanik taamaattunik tunniussineqassasoq.

Imm. 2. Akileraaruseriffiup aalajangissavaa imm. 1 naapertorlugu nalunaaruteqarnerit qanoq ililluni tunniunneqartassanersut, tamatumani kontop qanoq ittuuneranik, kontoqartup aqqanik, najugaanik aammalu inuttut normuanik, suliffeqarfiup ilisarnaataanik normumik (GER-nr.) suliffeqarfittut ingerlatsiviup normuanik (CVR-nr.) imaluunniit inuussutissarsiummik ingerlatsiviup normuanik (SE-nr.). Akileraaruseriffiup kontonik pigisaqartunut, inuttut normoqaratillu ingerlatsivittut normoqanngitsut pillugit nalunaaruteqarnermi erseqqinnerusumik najoqputassat aalajangersinnaavai
Imm. 3. Paasissutissiisussaatitaanermi aamma pineqarput kontut il.il. ukiup ingerlanerani

atorunnaarsimasut. Kontunut taamaattunut tunngatillugu atorunnaarsitsinermi uninngasuutit amerlassusii nalunaarutigineqassapput.

Imm. 4. Pisariillisaataatillugu paasissutissallu pineqartut akileraarutinik nakkutilliinermut pingaaruteqarpianngikkaangata, akileraaruseriffiup imm. 1 aamma 2 naapertorlugit inunnut ataasiakkaanut imaluunniit paasissutissiisussaataitaasut qassiikkaanut imaluunniit kontonut assigiinningsunut ataasiakkaanut tunngatillugu atuukkunnaartissinnaavaa annikinnerulersillugilluunniit, taamatullu aamma akileraaruseriffiup aningaasat nalunaarutigineqartussaaf ikinnerpaaffissaat pillugu aalajangersaasinnaalluni.

Imm. 5. Paasissutissiisussaataitaasup kontomik pigisaqartumut aningaasat nalunaarutigineqartut amerlassusaannik nalunaaruteqarnermik ilisimatissavaa. Kontomik pigisaqartumut ilisimatitsissuteqarneq pissaaq kingusinnerpaamik ukiup paasissutissiissutinut attuumassuteqartup tulliani febuariip aallaqqaataani.

§ 3. Kinaluunniit ingerlatsinerminut atatillugu erniaqartitsilluni aningaasanik taarsigassarsisitsisartoq taarsigassanilluunniit isumagisaqartartoq, akileraarusigaanissamut atugassanik ukiut tamaasa namminneerlutik tamanna pillugu akileraaruseriffimmut nalunaaruteqartassaaq.

Imm. 2. Nalunaaruteqarneq taarsigassarsitinneqartup kinaaneranut paasissutissanik, paasissutissanillu kontomut taarsigassarsinermullu pissutsit attuumassuteqartut pillugit paasissutissiissutinik imaqassaaq. Aningaasanut taarsigassarsianut ataasiakkaanut tunngatillugu oqaatigineqassapput:

- 1) taarsigassarsinerup qanoq ittuunera,
- 2) ernialiutat imaluunniit erniat akiligassanngorsimasut,
- 3) taarsigassarsinermut atatillugu ernianik nalunaaqutsiineq, qaammatisiutit malillugit ukiup nalunaaruteqaataasup siuliani ernialiussanik akiligassanngoreersunik akiliuteqarsimannginnermi, tamatumunnga nalunaaruteqartussaatailluni,
- 4) taarsigassarsinermut atatillugu ernianik nalunaaqutsiineq, qaammatisiutit malillugit ukiumi nalunaaruteqaataasumi taarsigassarsianik akiligassaajunnaarsitsisoqarsimatillugu tamatumunnga nalunaaruteqartussaatailluni, imaluunniit ukiuni siuliinut tunngatillugu,
- 5) sullissinermut matussutissatut ingerlaavartumik ernialiuttakkat il.il.,
- 6) sillimmatissanut aningaasaateqarfimmut allaffissornermullu akiliutit,
- 7) realkreditinstitutsit sillimmatissanut aningaasaateqarfiinit akileraarutaasussanik agguaaasinersiat amerlassusii, agguagarsiat tiguisumit ukiumi tunniussiffiusumi isertitatut naatsorsuutigineqartussaataillugit,
- 8) ulloq ernialiiffiusoq,
- 9) 31. decemberimi akiitsut, aamma
- 10) akiitsut 31. decemberimi nalingat, taarsigassarsiat aningaasanut nioqquteqarfimmi nalunaarsukkanik obligationinik tunngaveqartumik taarsigassarsiaappata.

Imm. 3. Pisariillisaataatillugu paasissutissallu pineqartut akileraarutinik nakkutilliinermut pingaaruteqarpianngikkaangata, akileraaruseriffiup nalunaaruteqarnissamut paasissutissiisussaataitaaneq atuukkunnaartissinnaavaa annikinnerulersilluguluunniit.

Imm. 4. Atukkiussanut tunngatillugu akiliuteqarnerit § 4 naapertorlugu paasissutissiisussaataitaasumit ingerlanneqarpata, imm. 1 naapertorlugu nalunaaruteqarnissamut

pisussaaffik atuutinngilaq.

§ 4. Aningaaseriviit, sparekassit, andelskassit, aningaasanik nioqqutillit, vekselinik nioqqutillit, eqqartuussissuserisut allallu, inuussutissarsiummik ingerlatsinerminnut atatillugu illuutininik qularnaveqqusiussaarluni taarsigassarsinermi allagartanik nakkutigisassaminnik sillimmatinik paarisassanik tigusaqartarunik, akileraarusigaanissamut atugassanik paasissutissanik imm. 2-mi taaneqartunik ukiut tamaasa namminneerlutik akileraaruseriffimmut nalunaaruteqassapput.

Imm. 2. Nalunaaruteqarneq taarsigassarsitineqartup sillimmatinillu pigisaqartup kikkuunerinut paasissutissanik aammalu taarsigassarsinermut tunngasunik paasissutissanik imaqaassaaq. Taarsigassarsitineqartunut sillimmatinillu pigisaqartunut ataasiakkaanut tunngatillugu oqaatigineqassapput:

- 1) ernialiutat imaluunniit erniat akiligassanngorsimasut,
- 2) taarsigassarsinermut atatillugu ernianik nalunaaqutsiineq, qaammatisiutit malillugit ukiumi nalunaaruteqaataasumi taarsigassarsianik akiligassaaajunnaarsitsisoqarsimatillugu tamatumunnga nalunaaruteqartussaatailluni, imaluunniit ukiuni siuliinut tunngatillugu,
- 3) 31. decemberimi akiitsut sinneri aamma
- 4) akiitsut 31. decemberimi sinnerisa nalingat, imm. 3 naapertorlugu akileraaruseriffimmit aalajangerneqartut.

Imm. 3. Pisariillisaataatillugu paasissutissallu pineqartut akileraarutinik nakkutilliinermut pingaaruteqarpiannikkaangata, akileraaruseriffiup nalunaaruteqarnissamut paasissutissiisussaataaneq atuukkunnaartissinnaavaa annikinnerulersilluguluunniit.

Kontonik pigisaqartut Kalaallit Nunaanni najuisuusut imaluunniit najugaqartuusut

§ 5. Kontomik, akileraaruserinermik ingerlatsineq pillugu Inatsisartut inatsisaanni § 36, imm. 1-mi oqaatigineqartutut pilersitsisoq, paasissutissat tunniunneqartut eqqortuuneri uppersarsaateqarfigissavai, kontomik ingerlatsisuusumut pas-imik, inuup normuanut uppersarsaammik allamilluunniit pisortanit kinaassutsimut uppersarsaateqarnermut attuumassuteqartumit pisuusumit takutitsinikkut. Inuup normua, GER-nr. imaluunniit SE-nr.-nut tunngasunik, akileraaruserinermik ingerlatsineq pillugu Inatsisartut inatsisaanni § 37, imm. 1-imi oqaatigineqartutut, paasissutissanik paasissutissiinermut atatillugu, kontomik pigisaqartup aqqanik najugaanillu paasissutissiissutinik tunniussineqassaaq.

Imm. 2. kontomik pilersitsisoqarsinnaanngilaq kontomik pilersitsiniartup imm. 1-imi taaneqartunik paasissutissanik nalunaaruteqareertinnagu.

Imm. 3. Paasissutissat imm. 1-imi taaneqartut kontomik pigisaqartup kinaaneranik paasinninnissamut pisariaqartut allanngorpata, kontomik pigisaqartup kontomik ingerlatsisumut paasissutissiisussaataasumut qaammat ataaseq qaangiutsinnagu allannguuteqarneq pillugu nalunaarfigissavaa.

Imm. 4. Piginneqatigiiffinnut, peqatigiiffinnut, legatinut allanullu kontomik pigisaqartuusunut inuup normuanik, GER-nr. CVR-nr. imaluunniit SE-normumik pigisaqanngitsunut tunngatillugu, siulittaasup inuttut normua imaluunniit inuup allap kontomik pigisaqartoq sinnerlugu iliuseqarsinnaasup inuup normuanik nalunaartoqassaaq.

Kontomik pigisaqartut Kalaallit Nunaata avataani najuisuusut imaluunniit najugaqartut

§ 6. Kontonut akileraaruserinermik ingerlatsineq pillugu Inatsisartut inatsisaanni § 36, imm. 1-imi taaneqartunut inunniit, piginneqatigiiffinnit peqatigiiffinnillu il.il., Kalaallit Nunaata avataani najugaqartunit najuisuusunilluunniit imaluunniit qaammatit pingasut sinnerlugit Kalaallit Nunaanniissimangitsunit pigineqartunut tunngatillugu, inuup normua, GER-nr. imaluunniit SE-nr. oqaatigineqassaaq aatsaat kontomik pigisaqartoq normumik taamaattumik tunineqarsimatillugu. Tamatumalu saniatigut kontomik pigisaqartup aqqa, najugaa nunalu angerlarsimaffigisaa oqaatigineqassapput.

Soraarnerussutisianut tunngasunik nalunaaruteqarnerit

§ 7. Soraarnerussutisiaqalernissamut aningaasaateqarfiit, soraarnerussutisiatigut inuuner-mullu sillimmasiissutitigut aqqissuussinernut selskabit allallu soraarnerussutisianik ingerlaavartumik inuuneq naallugu sillimmasiissutinik tunniussisartut, ukiut tamaasa namminneerlutik akileraaruseriffimmit piumaffigineqaqqaaratik, Akileraaruserinermik ingerlatsineq pillugu Inatsisartut inatsisaanni § 39, imm. 1 aamma 2-imi taaneqartutuut, akileraaru-seriffimmut paasissutissiisassapput aamma soraarnerussutisiamut aqqissuussinermut pigisaqartup kinaaneramik paasinninnissamut pisariaqartut pillugit paasissutissiinerit ilanngullugit.

Imm. 2. Kinaluunniit soraarnerussutisiassanik aqqissuussinermik, aningaasarsianit akileraarutit pillugit Inatsisartut inatsisaanni §§-it 39 aamma 40 naapertorlugit taasanik pilersitsisoq, paasissutissiisussaataasunut aqqissuussinermut pigisaqartup (kontomik piginnittup) kinaaneramik paasinninnissamut pisariaqartut pillugit paasissutissiisaaq, tamatumani inuup normua nalunaaruteqartussaannerit atuutsitsinissamut pisariaqartinneqartut, aammalu paasissutissat tunniunneqartut eqqortuuneri uppersarsaateqarfigineri ilanngullugit.

Imm. 3. Soraarnerussutisiassanut aqqissuussinermik pilersitsisoqarsinnaanngilaq pilersitsiniartup imm. 2-imi taaneqartunik paasissutissanik nalunaaruteqareertinnagu. Imm. 2-imi taaneqartutut pissutsit allannguuteqarpata, paasissutissiisussaataasumut qaammat ataaseq qaangiutsinnagu allannguuteqarneq pillugu nalunaaruteqartoqassaaq.

Aningaasanik nakkutigisanik taarsigassarsianillu nalunaaruteqartarneq

§ 8. Suliffeqarfimminut atatillugu aktianik nakkutigisassanik nalilinnut sillimmasiinermit tigummiartaqtoq, ukiut tamaasa akileraaruseriffimmut sillimmasiissutinit aningaasanik nioqquteqarfimmi nalunaarsukkanit aktianit assigisaannillu, iluanaarutitik qaammaatitsiutit malillugit ukiup atuuttup siuliini pissarsiarititaasut pillugit nalunaaruteqartassaaq.

Imm. 2. Imm. 1 naapertorlugu nalunaarutit iluanaarutitik tigusaqartunut ataasiakkaanut tamanut paasissutissanik makkunanga imaqaassapput:

- 1) Nalunaaruteqartup kinaaneramik paasinninnissamut pisariaqartut pillugit, saqqummiussineq.
- 2) Iluanaarutitik tigusaqartup kinaaneramik paasissutissat, tamakkua pigineqarnerat naapertorlugu.

3) Iluanaarutit ukiup ingerlanerani agguagarsiaritinneqartut annertussusiat.

4) Aktiat il.il. iluanaaruteqaataasoq nunami sumi pilersinneqarsimanersoq, aktiat il.il. aningaasanik niuerfimmi nalunaarsugaappat.

Imm. 3. Nalilinnut sillimmasiivimmiititsisoq imm. 1-imi taaneqartutut, nalunaaruteqarnissamut paasissutissiissuteqartussaasumut kinaanini ilisimatitsissutigissavaa, tamatumani inuup normua, GER-nr., CVR-nr. imaluunniit SE-normu, ilanngullugit.

Imm. 4. Imm. 2-mi taaneqartutut aktianit iluanaarummik pissarsisoq, nalunaaruteqarnissamut paasissutissiissuteqartussaasumut kinaanini ilisimatitsissutigissavaa, tamatumani inuup normua, CVR-nr. imaluunniit SE-nr., ilanngullugit. Tamannali atuutinnilaq iluanaarutitik pissarsisoq piginneqatigiiffinnut tunngasumik inatsisini malittarisassat malillugit piginneqatigiiffimmi peqatigiiffimmiluunniit il.il. agguagarsisitsisumi nalunaarsugaanissaq pisussaangippat.

Imm. 5. Pisariillisaataatillugu paasissutissallu pineqartut akileraarutitik nakkutilliinermut pingaaruteqarpiangikkaangata, akileraaruseriffiup inunnu atasiakkaanut imaluunniit qassiikkaarlugit paasissutissiisussaataasunut nalunaaruteqarnissamut paasissutissiisussaataaneq imm. 1-imiit 4-mut maleruagassat taaneqartut atuukkunnaartissinnaavai annikinnerulersillugilluunniit.

§ 9. Suliffeqarfimminut atatillugu aktianik nakkutigisassanik nalilinnut sillimmasiivimmi tigummiqartoq, ukiut tamaasa akileraaruseriffimmut qaammatsiutit malillugit ukiup siuliani paarititaasunit aningaasanik nioqquteqarfimmi nalunaarsukkanit aktianit assigisaannillu nalunaaruteqartassaaq, sillimmasiivimmiititsineq inummut kiffartuussineruppat.

Imm. 2. Nalunaarutit aktianut atasiakkaanut tunngasunik paasissutissanik makkunanga imaqaassapput, aktiat suuneri oqaatigalugit:

1) Qaammatsiutit malillugit ukiup naanerani nalimikkut nalingi.

2) Ukiup ingerlanerani aktiamit iluanaarut agguagarsiaritinneqartoq aammalu aktiat nunami sumi pilersitaaneranut paasissutissiissut.

Imm. 3. Suliffeqarfimminut atatillugu aktianik nioqquteqartoq, ukiut tamaasa akileraaruseriffimmut aningaasanik nioqquteqarfimmi nalunaarsugaasunik aktianik il.il. qaammatsiutit malillugit ukiup atuuttuusup siuliani tunisaqarnernik nalunaaruteqartassaaq tunisaqarnerit inummut kiffartuussineruppata. Nalunaaruteqarneq aktiap suuneranik, qanga tunineqarfianik aammalu aktiap tunineqarnerani nalingitinneqartoq pillugu paasissutissanik imaqaassaaq.

Imm. 4. Nalilinnik sillimmasiivimmiititsisoq tuniniaassunneqartorluunniit, nalunaaruteqarnissamut paasissutissiisussaataasumut kinaanerminik, tamatumani aamma inuttut normuminik ilisimatitsissuteqassaaq.

Imm. 5. Pisariillisaataatillugu paasissutissallu pineqartut akileraarutitik nakkutilliinermut pingaaruteqarpiangikkaangata, akileraaruseriffiup inunnu atasiakkaanut imaluunniit qassiikkaarlugit paasissutissiisussaataasunut nalunaaruteqarnissamut paasissutissiisussaataaneq imm. 1-imiit 4-mut maleruagassat taaneqartut atuukkunnaartissinnaavai annikinnerulersillugilluunniit.

§ 10. Pisortat karsii, realkreditinstitutsit, pappiaqqanut nalilinnut qitiusumik nalunaarsuiffiit, aktiat tunngavigalugit piginneqatigiiffiit, aningaaseriviit, sparekassit, andelskassit, aningaasaliissuteqarnernut peqatigiiffiit, aningaasanik nioqquteqartut allallu, ernianut allagartanik aningaasannortitsisartut, obligationinulluunniit tunngasunik ernialiisartut, akileraarusiinermut atugassanik minnerpaamik ukiumut atasiarlutik namminnerlutik akileraaruseriffimmut ukiup siuliani obligationinik pigisaqartut

ataasiakkaat ernianut allagartanik aningaasanngartitaasa ernialiuussalluunniit aningaasartaasa amerlassusiinik obligationillu pineqartut taaguutaannik ukiullu pineqartup naanerani nalimikkut nalinginik aammalu paasissutissanik imm. 3-mi 4-imilu taaneqartunik tunniussisassapput.

Imm. 2. Imm. 1-imi taaneqartutut taamatutaaq aningaasaliinernut peqatigiiffinni aningaasaliinernut uppersaatinut tunngatillugu iluanaarutinut allagartanik aningaasanngartitsinerit imaluunniit aningaasaliinernut peqatigiiffinni kontonik ingerlatsiviusuni aningaasaliissutinik pigisassanngartitsinernik aammalu aningaasaliissutinut uppersaatinut kontomik ingerlatsiviusumi aningaasaliinernut peqatigiiffiup taaguutaa, tamatumani suuneri sumullu atortuuneri, ukiullu naanerani nalimikkut nalingi pillugit paasisitsissutigineqassapput. Akileraaruseriffiup aamma aalajangersinnaavaa, nalunaaruteqarnissamut paasissutissiisussaataasut paasissutissanik akileraaruseriffimmut nalunaaruteqarnissamut pisussaaffiup naammassinninnissamut atugassanik imminnut ilisimateqatigiittassasut. Taamatutaaq obligationinik, allatamik erniaqartinnagit imaluunniit aningaasarsianit akileraarutit pillugit Inatsisartut inatsisaanni § 18 imm. 3 naapertorlugu, erniasarititassanut minnerpaaffissarititaasoq ataallugu erniaqartillugit pilersitaasunik tamakkiisumik akiligaqarnerit pillugit paasissutissat tunniunneqassapput.

Imm. 3. Aningaasaliinernut peqatigiiffimmi kontonik ingerlatsiviusumi ilaasortaasoq peqatigiiffiup imm. 1 aamma 2 naapertorlugu ilaasortaasup aningaasaliissutaanut ikisanik nalunaaruteqarnissami atugassanik imaluunniit peqatigiiffiup § 11 naapertorlugu tigusat pillugit peqatigiiffiup nalunaaruteqarnissaani atugassanik, qinnuteqartoqartillugu peqatigiiffiup akileraarnermut tunngatillugu attuumassuteqartunik tunngavigisat ilaasortaasup isertitanik naatsorsuineri atugarisai pillugit, tamatumani aamma pineqartup inuuniutigalugu pissarsianit akileraarusigaanersoq nalunaaruteqassaaq.

Imm. 4. Ernianut iluanaarutinulluunniit kuponinik aningaasanngartitsinissamik imaluunniit pappiaqqanik aningaasanik nalilinnik qitiusumik naluaarsuiffimmi kontomik pilersitsinissamik qinnuteqartoq, akileraaruseriffiup ilusissamik aalajangigaa malillugu iluseqartumik aningaasanngartitsiviusoq imaluunniit kontomik ingerlatsiviusumik institutti piginnittuusup kinaaneranik ilisimatitsissuteqassaaq paasissutissallu tunniunneqartut eqqortuuneri uppersarlugit. Kuponi aningaasanngartinneqassannqilaq erniallu akilernerqassanatik aningaasanngartitsiffiusoq imaluunniit kontomik ingerlatsiviusumik institutti paasissutissanik taaneqartunik pereertinnagu.

§ 11. Kinaluunniit nuussinermik ingerlatitseqqiilluni akunnermuliuttuusooq imaluunniit pissarsisoq imaluunniit nuussisoq pillugit akunnermuliuttutut taasaq imm. 3 naapertorlugu akileraaruseriffimmut obligationinik erniasianullu allagartanik, tamatumani aamma obligationinik allassimasumik erniaqartitaanngitsunik imaluunniit erniarititat minnerpaaffissaat ataallugu allaassimasumik erniaqartillugit pilersitaasunik, aningaasarsianit akileraarutit pillugit Inatsisartut inatsisaanni § 18, imm. 3 naapertorlugu, tunniussinernik ilisimatinneqassaaq. Tamanna aamma atuuppoq aningaasaliissutinut uppersaatinik taamaattunullu tunngatillugu iluanaarutinut kuponinik tunniussinernut aammalu aningaasanngartitsinernut, tamatumani aamma aningaasanngartitsinernut ataasiakkaanut tunngatillugu piffissaq aningaasanngartitsiffiusoq pillugu, aningaasaliisarnernut peqatigiiffimmi kontomik ingerlatsiviusumi uninngasuutinut, aammalu tigusinerni ataasiakkaani aningaasaliisarnernut peqatigiiffiup aningaasanik nalilinnik pappiaraataasigut iluanaarutinut annaasaqaatinulluunniit piviusunngortitsinerup nalaani suli piviusunngortitaanngitsortaanut. Akileraaruseriffiup

attuumassuteqartut peqataasut § 10, imm. 4-mi taaneqartutut inuup normuanik il.il. paasisitsissuteqarnissamut pisussaafilernerqarsinnaapput.

Imm. 2. Taamatuttaaq imm. 1-imi aalajangersagaq terminimut, pisinermut tunisinermullu tunngasunik isumaqatigiissutinut nuussinernulluunniit atuuppoq, isumaqatigiissuteqartuni illuatungiusut arlaat inuinnaappat.

Imm. 3. Suliffeqarfimminut atatillugu imm. 1 aamma 2-mi taasani pappiaqqanik nalilinnik imaluunniit isumaqatigiissutinik niueruteqarlunilu nuussinermik ingerlatitseqqiilluni akunnermuliuttusoq, imm. 1 naapertorlugu naalunaaruteqarluni paasisutissiisussaataavaoq. Taamatuttaaq aamma atuuppoq kimulluunniit inuutissarsiutigalugu isumaqatigiissutinik taamaattunik suliaqarluni isumaqatigiissusiortartumut imaluunniit nuussinermik ingerlatitseqqiilluni akunnermuliuttusumut. Kontomik ingerlatsiviusumi aningaasaliinernut peqatigiiffinni kontumit tigusinerit pillugit tamatumani peqatigiiffik nalunaaruteqartussaataavaoq. Pappiaqqat nalillit imaluunniit illuatungeriit isumaqatigiissutaat imm. 1 aamma 2-mi taasat nuunneqartillugit, taakkualu oqaaseqatigiinni siullerni taasatut nalunaaruteqarnikkut paasisutissiisussaataaangippata, imaluunniit nalunaaruteqarnikkut paasisutissiisussaataasuunngitsumit tamanna pillugu isumaqatigiittoqartillugu aamma nuussinermik ingerlatitseqqiilluni akunnermuliunnikkut isumaqatigiissutinik suliaqartoqartillugu, pappiaqqanik nalilinnik imaluunniit isumaqatigiissummik illuatungiusumit pissarsisuusumit nalunaaruteqarnikkut paasisutissiisussaataaneq tassannga pissaaq.

Imm. 4. Pappiaqqanik nalilinnik imaluunniit isumaqatigiissutinik imm. 1 naapertorlugu nuussisoqartillugu imaluunniit isumaqatigiissummik imm. 2 naapertorlugu inuinnarmit imaluunniit inatsisit naapertorlugit inuttut tunngatinneqarsinnaasup akornanni isumaqatigiissusiortoqarsimatillugu Kalaallilu Nunaanni angerlarsimaffeqartuutillugit imaluunniit Kalaallit Nunaanni aalajangersimasumik ingerlatsiveqartumik inuussutissarsiuteqartut (akileraartartut) aamma inuinnarmit imaluunniit inatsisit naapertorlugit inuttut tunngatinneqarsinnaasup nunanit allanit pisup, imm. 3-imi oqaaseqatigiit siulliit naapertorlugit nalunaaruteqarnikkut paasisutissiisussaataaangitsuuppat aamma nuussineq akunnermuliuttumit imaluunniit isumaqatigiissut taamatut paasisutissiisussaataaangitsumit suliarineqarpat, akileraartup nalunaaruteqarnikkut paasisutissiisussaataaneq akisussaaffigivaa.

Imm. 5. Pissarsisoq nuussisorluunniit, nalunaaruteqarnikkut paasisutissiisussaataanermik pisussaaffeqarnermik naammassinninngitsoq, obligationinut il.il. imaluunniit kuponimut attuumassuteqartunik ernianik iluanaarutinillu akileraartussatut isigineqarsinnaavoq.

§ 12. Pissutsit atuuttut tamanna taperserpassuk, paasisutissarlu akileraartarnermi nakkutilliinermut annikinnerusumik pingaaruteqarpat, akileraaruseriffiup obligationinik il.il piginnittunut ataasiakkaanut qassiikkuutaanulluunniit nalunaaruteqarnikkut paasisutissiisussaataanermik pisussaaffeqarneq atorunnaarsissinnaavaa annikinnerulersilluguluunniit.

Pineqaatissiinerit

§ 13. Piaaraluni imaluunniit mianersuaalliorluni § 1, imm. 1, § 2, imm. 1-3-mut aamma 5, § 3, imm. 1 aamma 2, § 4, imm. 1 aamma 2, § 5, imm. 1, 3 aamma 4, § 7, imm. 1 aamma 2, § 8, imm. 1-4-mut, § 9, imm. 1-4-mut, § 10 aamma § 13, imm. 1-4-mut unioqqutitsisoq akilisitaanermik pineqaatissinneqassaaq.

Atuutilerfia

§ 16. Nalunaarut 1. januar 2007 atuutilerpoq

Imm. 2. Ilutigitillugu Aningaaserivinni il.il. ernianit isertitat il.il. akileraarutinut tunngatillugu nakkutigineqarnerat pillugu Namminersornertullutik Oqartussat nalunaarutaat nr. 28, 23. august 1986-imeersoq atorunnaarpoq.

Kalaallit Nunaanni Namminersornerullutik Oqartussat, ulloq 1. december 2006

Josef Motzfeldt

/

Kaare Hagemann